

Jinasis

Wal dijan stori im det basdamwan stori. Im stat garram det stori blanga God weya imbin meigim ebrijing en afta imbin meigim Edam en Ib dubala. Det stori blanga Nowa en det bigbala fladwoda im iya du, en loda stori iya blanga Eibrahem en blanga Aisik en Ishmeil en blanga Jeikob en Isau en blanga Josef en im braja olabat.

God bin meigim ebrijing

[1] ^{1,2} Orait, longtaim wen God bin stat meigimbat ebrijing, no enijing bin sidan. Imbin jis eniwei, nomo garram enijing. Oni strongbala woda bin goran goran ebriwei, en imbin brabli dakbala, en det spirit blanga God bin mubabat antop langa det woda.

³ Brom deya God bin tok, "Lait!" En lait bin kamat.

⁴ Wal wen God bin luk det lait bin gudwan, imbin gudbinji.

⁵ Brom deya God bin kadimat det lait brom det

Jinasis 1

dakbala. Det lait imbin kolum Deitaim, en det dakbala imbin kolum Naitaim.

Brom deya naitaim bin gowei na, en wen imbin ailibala, imbin sekan dei na.

⁶ Brom deya God bin tok, "Larram samting sidan blanga kadimat det woda en meigim det woda sidan miselp miselp." ⁷ En imbin hepin lagijat na, dumaji God bin meigim det ting. Det ting bin kadimat det woda langa bodam brom top, ⁸ en God bin kolum det ting Skai.

Brom deya naitaim bin gowei na, en wen imbin ailibala, imbin det namba thri dei na.

⁹ Brom deya God bin tok, "Larram det woda langa bodam hipimap miselp langa wan pleis blanga meigim draiwan kamat." En imbin hepin lagijat na, ¹⁰ en God bin kolum det draiwan Graun, en det woda weya bin hipimap miselp langa wan pleis, God bin kolum det woda Solwoda.

Wal wen God bin luk ebrijing bin gudwan, imbin gudbinji.

¹¹ Brom deya God bin tok, "Larram det graun growimap olkain tri en gras en purdiflawa, sambala garram sid daga en sambala garram frut daga." En imbin hepin lagijat na. ¹² Det graun bin growimap olkain tri en gras en purdiflawa.

Wal wen God bin luk ebrijing bin gudwan, imbin gudbinji.

¹³ Brom deya naitaim bin gowei na, en wen imbin ailibala, imbin det namba fo dei na.

¹⁴ Brom deya God bin tok, "Larram olkain lait kamat langa top blanga kadimat deitaim brom

Jinasis 1

naitaim. Detlot lait garra shain blanga shoum wotaim ola difrinwan dei en sisan en serramoni garra stat,¹⁵ en detlot lait garra shain brom skai blanga gibit lait langa ola graun du." En imbin hepin lagijat na.¹⁶ God bin meigim dubala bigwan lait. Imbin meigim san blanga deitaim, en imbin meigim mun blanga naitaim, en imbin meigim bigismob sta du.¹⁷ Imbin pudum ol detlot lait langa skai blanga shain langa graun,¹⁸ en imbin pudum olabat deya blanga sidan deitaim en naitaim, blanga kadimat det lait brom det dakbala.

Wal wen God bin luk ebrijing bin gudwan, imbin gudbinji.

¹⁹ Brom deya naitaim bin gowei na, en wen imbin ailibala, imbin det namba faib dei na.

²⁰ Brom deya God bin tok, "Larram olkain fish en enimul sidanbat langa woda, en larram ola bed flaibat langa skai." ²¹ En God bin meigim ola difrinkain enimul blanga sidanbat langa woda du. Imbin meigim sambala brabli bigwan blanga sidanbat insaid langa solwoda, en imbin meigim olkain difrinwan bed blanga flaibat langa skai.

Wal wen God bin luk ebrijing bin gudwan, imbin gudbinji. ²² Imbin gudbinji blanga ol detlot enimul, en imbin dalim ol detlot langa woda blanga meigim miselp bigmob en bilimap det woda, en imbin dalim ol detlot bed blanga meigim miselp bigmob du.

²³ Brom deya naitaim bin gowei na, en wen imbin ailibala, imbin det namba siks dei na.

²⁴ Brom deya God bin tok, "Larram olkain enimul sidan langa graun, kwaitwan enimul en wailwan enimul en olkain enimul weya wokabat

Jinasis 1,2

garram binji langa graun." En imbin hepin lagijat na,
²⁵ dumaji God bin meigim olabat.

Wal wen God bin luk ebrijing bin gudwan, imbin gudbinji.

²⁶ Brom deya God bin tok, "Wal wi lafta meigim pipul na. Wi lafta meigim olabat laik wi, blanga sidan laik wi. Olabat garra sidan bos blanga ola fish en bed en enimul, blanga ola kwaitwan en ola wailwan en ol detlot weya wokabat garram binji langa graun."

²⁷ Brom deya God bin meigim dubala pipul laik imself. Imbin meigim boiwan en gelwan, ²⁸ en imbin tok gudbinjiwei langa dubala. Imbin tok, "Yundubala garra abumbat bigmob kid, dumaji yundubala garram loda kantri blanga sidanbat. Detlot kid blanga yundubala garra go ebriweya langa ola kantri en meigim miselp bos blanga detlot kantri, dumaji mi na meigim yubala bos blanga ola fish en bed en enimul olabat. ²⁹ En blanga yubala daga ai gibit yubala olkainaba sid daga en frut daga blanga idimbat. ³⁰ Blanga ola enimul en ola bed ai gibit olabat gras en bushis blanga idimbat."

Wal ebrijing bin hepin lagijat na weya God bin tok.

³¹ Brom deya God bin luk ol detlot ting weya imbin meigim, en imbin rili hepi, dumaji ol detlot ting bin brabli gudwan.

Brom deya naitaim bin gowei na, en wen imbin ailibala, imbin det namba seben dei na.

[2] ¹ Wal lagijat na God bin meigim ebrijing, en ebrijing bin sidan na. ² En langa det namba seben dei

Jinasis 2

God bin binijim ola job blanga im. Imbin binij det wek blanga im na, ³en imbin kadimat det laswan dei brom detlot najalot dei. Det namba seben dei na im det laswan dei en im blanga im ronwan dei tharran deya. God bin tok brabliwei blanga det namba seben dei, dumaji langa det dei na imbin binij meigimbat ebrijing. Langa det dei na imbin binijim ebrijing weya imbin dumbat.

⁴Wal lagijat na ebrijing bin kamat.

God bin meigim men en wuman

⁵Wal longtaim wen God bin meigim ebrijing, dijan graun bin sidan garram no tri en no gras en no purdiflawa. Imbin lagijat dumaji God nomo bin sendim eni rein langa dis kantri, en nobodi bin sidan langa dis kantri blanga wekim ola graun. ⁶Oni det woda brom insaid langa graun bin kamat blanga wodrim dis kantri.

⁷Brom deya God bin meigim men brom graun. Imbin gedim das, en imbin meigim det men garram det das, en God bin blowim win langa det men nos, en imbin weikimap im na.

⁸Brom deya God bin growimap gadin sanrais langa det pleis dei kolum Idin, en deya na langa det gadin imbin pudum det men weya imbin meigim. ⁹God bin pudum olkain purdiwan tri garram loda daga deya, en rait langa midul langa det gadin imbin pudum dubala tri kolum Tri Blanga Laif en Klebabala Tri. Wen enibodi dagat det daga brom det wanbala tri, im meigim olabat sidan laibala fogud. En det daga brom det najawan tri im meigim olabat sabi ola

Jinasis 2

godwan ting en ola nogudwan ting du.

¹⁰Wal wanbala krik deya bin wodrimbat det gadin, en lodan weya det krik bin kamat brom det gadin, det krik bin kadimat miselp langa fobala riba.

¹¹Det feswan riba bin neim Paishan, en imbin go raidaran langa det kantri kolum Habila. Langa det kantri na ola brabliwan gol sidan, ¹²en olkain gudsmelwan tri en purdiwan ston bin deya du. ¹³Det sekanwan riba bin neim Gihon, en imbin go ebriweya langa det kantri kolum Kush. ¹⁴Det namba thri riba bin neim Taigris, en imbin go sanraisaid brom det kantri kolum Asiriya. Det namba fo riba bin neim Yufreitis.

¹⁵Wal God bin pudum det men deya langa det gadin blanga wekim det graun en lukaftumbat det gadin, ¹⁶en God bin dalim det men. Imbin tok, "Yu gin abum eni daga brom ola tri langa dis gadin. ¹⁷Oni wanbala tri deya, det Klebabala Tri, yu nomo lau dagat det daga. If yu dagat det daga, wal seim dei yu garra dai."

¹⁸Brom deya God bin tok miselp. Imbin tok, "Im nogud blanga dis men blanga sidan miselp. Ai garra meigim meit blanga im blanga albumbat im."

¹⁹Brom deya God bin gedim ola enimul en ola bed weya imbin meigim, en imbin deigim olabat langa det men. Imbin bringimap olabat langa im blanga gibit neim langa olabat. Lagijat na deibin gedim olabat neim. ²⁰Det men Edam bin gibit neim langa ola bed en ola enimul olabat. Bat ol detlot nomo bin brabliwan meit blanga im, najing.

²¹Brom deya God bin meigim det men silip, en wen imbin dedsilip, God bin deigmat wanbala ribbon

Jinasis 2,3

brom im. Afta wen imbin deigmat det ribbon, imbin jadimap det men, ²² en imbin meigim wuman brom det ribbon.

Afta na God bin deigim det wuman langa det men, ²³ en det men bin tok, "Dijan na! Brom main ronwan bon en brom main ronwan bif. Wal dei garra kolum im wuman, dumaji God bin meigim im brom main ron ribbon."

²⁴ Wal dumaji imbin hepin lagijat na, ebri men garra oldei libum im mami en dedi en im garra merrit langa im waif, en dubala sidan wanbala na.

²⁵ Wal det men en im waif dubala bin neigidbala, en dubala nomo bin sheim wen dubala bin neigidbala.

Dubala bin dagat daga

[3] ¹ Wal wen God bin meigim ola enimul, wanbala deya bin rili trikiwan. Imbin brabli klebawan langa ola najalot enimul. Tharran im det sneik na.

Wal bambai na det sneik bin go langa det wuman, en imbin tok, "Yu reken God bin dalim yundubala nomo blanga abum daga brom eni tri langa dis gadin?"

² Det wuman bin tok, "God bin dalim mindubala blanga idimbat enijing langa dis gadin. ³ Oni wanbala tri deya weya im jandap la midul la dis gadin, tharran na mindubala kaan tatjam en dagat. If mindubala tatjam en dagat daga brom det tri, binij. Streidawei mindubala garra dai."

⁴ Wal det sneik bin dalim det wuman. Imbin tok, "God im laiya. Yu kaan dai. ⁵ God bin tok lagijat dumaji im sabi wen yu dagat det daga, yu garra

Jinasis 3

meigim miselp jis laik God. Yu garra sabi ebrijing weya im gud en ebrijing weya im nogud jis laik God sabi."

⁶ Brom deya det wuman bin lukinat det tri na. Det tri bin purdiwan, en det daga langa im bin luk gudwan blanga dagat. Wal det wuman bin jinggabat blanga meigim miselp klebabala na.

Brom deya det wuman bin go en imbin gedim daga brom det tri, en imbin dagat na, en afta imbin deigim det daga langa im hasbin, en imbin dagat det daga du.

⁷ Streidawei wen dubala bin binijim det daga weya dubala nomo bin lau dagat, dubala bin sabi dubala bin dum nogudbala ting, en dubala bin luk miselp neigidbala, en dubala bin sheim. Dubala bin gedim lif brom det tri dei kolum figtri, en dubala bin mindimap ola lif, en dubala bin kaburumap miselp na.

⁸ Brom deya kultaim na wen det san bin godan, dubala bin lisin nois langa det gadin. God bin kaminap langa dubala, en dubala bin go en blandim miselp langa ola tri.

⁹ Wal God bin singat langa det men. Imbin tok, "Wujei yu?"

¹⁰ En det men bin tok, "Aibin irrim yu wokwok iya langa dis gadin, en aibin fraitin. Wal aibin blandim miselp, dumaji mi neigidwan."

¹¹ God bin tok, "Hubin dalim yu, yu neigidwan? Maitbi yubin dagat det daga weya aibin tok yu nomo lau abum."

¹² Wal det men bin bleim det wuman na. Imbin tok, "Det wuman weya yubin gibit langa mi, im na bin

Jinasis 3

gibit mi det daga, en aibin dagat."

¹³ Wal God bin askim det wuman na. Imbin tok, "Wotfo yubin lagijat?"

En det wuman bin bleim det sneik. Imbin tok, "Det sneik bin temtim mi blanga dagat det daga."

¹⁴ Brom deya God bin tok langa det sneik. Imbin tok, "Ai garra panishim yu blanga det ting. Oni yu na ai garra panishim. Nomo detlot najalot enimul. Oni yu na. Wal yu garra oldei wok garram yu binji la graun, en yu garra idimbat graun olawei raidap yu dai. ¹⁵ En ai garra meigim yundubala det wuman heidim gija. Det kid blanga det wuman en det kid blanga yu garra sidan brabli bedfren fogud. Det kid blanga im garra smeshimap yu hed, en yu garra baidim im fut." Lagijat na God bin tok langa det sneik.

¹⁶ Brom deya God bin tok langa det wuman na. Imbin tok, "Wen yu abum beibi, ai garra meigim loda trabul en pein blanga yu. Strongbala pein garra kamat langa yu wen yu garra abum beibi. Bat yu garra stil wandim yu hasbin, en im garra sidan bos blanga yu." Lagijat na God bin tok langa det wuman.

¹⁷ Brom deya God bin tok langa det men na. Imbin tok, "Yu nomo bin lisin langa mi basdam wen aibin dalim yu nomo blanga dagat det daga brom det tri. Yubin lisin langa yu waif, en yubin dagat det daga. Wal dumaji yubin lagijat, ai garra meigim det graun adwan, en yu garra wek adbala na blanga growimap yu daga. Yu garra wek adbala olawei raidap yu dai. ¹⁸ Det graun garra growimap olkain rabishwan gras garram jigininbala en bindiyai. ¹⁹ Yu garra swet gidap blanga gedim daga blanga idimbat olawei raidap yu

Jinasis 3

dai en yu bodi garra gobek langa graun. Yu garra gobek langa det seimwan graun weya aibin meigim yu basdam." Lagijat na God bin tok langa det men Edam.

²⁰ Bròm deya Edam bin gibit im waif neim na. Imbin kolum im Ib, dumaji im na mami blanga ebribodi.

²¹ Brom deya God bin meigim klos blanga dubala garram enimul skin, en imbin meigim dubala werrimon detlot klos na.

²² Brom deya God bin tok miselp. Imbin tok, "Det men im seim jis laik wi. Im sabi ebrijing weya im gudwan en ebrijing weya im nogudwan. Wal wi kaan larram im abum eni daga brom det najawan tri, brom det Tri Blanga Laif. If im dagat det daga brom det tri na, wal im garra sidan laibala fogud."

²³ Brom deya God bin andimwei det men en wuman brom det gadin kolum Idin, en God bin meigim det men wekim det graun, dumaji imbin meigim det men garram graun.

²⁴ Brom deya sanraisaid langa det gadin God bin pudum sambala einjul deya kolum tjerabim, en imbin meigim bigbala naif garram faiya jandap deya du. Det naif bin tenibat miselp ebriwei blanga stapam enibodi en nomo larram olabat kaman gulijap langa det Tri Blanga Laif.